

**DIE SUID-AFRIKAANSE
GENOOTSKAP VAN
PLANTKUNDIGES**

KONSTITUSIE

**Privaatsal X101
PRETORIA**

November 1978

DIE SUID-AFRIKAANSE GENOOTSKAP VAN PLANTKUNDIGES

1. DIE GENOOTSKAP

1.1 NAAM

Die naam van die Genootskap is "Die Suid-Afrikaanse Genootskap van Plantkundiges", hierna die "Genootskap" genoem.

1.2 DOELSTELLINGS

Die Genootskap is gestig vir die bevordering van Plantkunde, om die status van hierdie beroep te bevorder en te handhaaf, asook om alles te doen wat wenslik mag wees om hierdie doelstellings te verwesenlik.

2. LIDMAATSKAP

2.1 LIDMAATSKAP

Die Genootskap bestaan uit Erelede, Gewone Lede, Lewenslede, Geaffilieerde Lede en Studentelede wat behoorlik deur die Raad verkies is, asook Instituutslede.

2.2 VOLLE LIDMAATSKAP

Slegs Erelede, Gewone Lede en Lewenslede is op die regte en voorregte van Volle Lidmaatskap geregtig.

2.3 ERELEDE

Erelede is persone wat die Genootskap spesiaal wil vereer vir buitengewone dienste wat hulle aan die Genootskap of aan Plantkunde gelever het.

2.3.1 Nominasies vir Erelidmaatskap kan deur 'n Volle Lid ondersteun deur ten minste tien (10) Volle Lede aan die Raad voorgelê word. Verkiezing geskied deur geheime posstembriefies. Om verkies te word moet

- (a) minstens driekwart van die Raadslede hulle stemme uitbring, en
- (b) minstens driekwart van die stemme uitgebring, ten gunste van die genomineerde wees.

2.4 BEVOEGDHEID VIR GEWONE LIDMAATSKAP

'n Gewone Lid moet ten tyde van sy verkiesing aan die volgende vereistes voldoen:—

(a) Hy moet 'n driejarige kursus in Plantkunde voltooi het en 'n graad of gelykwaardige kwalifikasie van 'n universiteit ontvang het. Daarbenewens moet hy een jaar ervaring as plantkundige hê.

of

Hy moet 'n vierjarige kursus in Plantkunde voltooi het en 'n honneursgraad of gelykwaardige kwalifikasie van 'n universiteit ontvang het.

(b) Hy moet in die normale uitvoering van sy pligte hom besig hou met die beoefening van Plantkunde as beroep.

(c) As persoon moet hy sodanig wees dat sy verkiesing tot lid, volgens die oordeel van die Raad, in die belang van die Genootskap sal wees.

(d) Die Raad het die reg om in buitengewone omstandighede enige persoon tot lid te verkies wat kragtens sy posisie en ervaring op die gebied van Plantkunde verkiesingswaardig is.

2.5 LEWENSLEDE

Gewone lede kan Lewenslede word na betaling van 'n bedrag wat in die Reglemente neergelê word, en hulle is onthef van die betaling van enige verdere ledegelde.

2.6 BEVOEGDHEID VIR GEAFFILIEERDE LIDMAATSKAP

'n Geaffilieerde Lid moet 'n persoon wees wie se werk in verband met Plantkunde staan of wat belang het by Plantkunde maar wat nie oor die nodige kwalifikasies en/of ervaring, wat vir Volle Lidmaatskap 'n vereiste is, beskik nie. As persoon moet hy sodanig wees dat sy verkiesing as Geaffilieerde Lid, volgens die oordeel van die Raad, in die belang van Plantkunde sal wees.

2.7 BEVOEGDHEID VIR STUDENTELIDMAATSKAP

'n Studentelid moet 'n *bona fide* student wees wat opleiding ontvang om hom as plantkundige te bekwaam.

2.7.1 Studentelidmaatskap, kragtens paragraaf 2,7, is geldig slegs tot aan die einde van die Genootskap se jaar waarin die Studentelid die ouderdom van 25 jaar bereik. Daarna sal dit jaarliks deur die Raad oorweeg word of die betrokke se studentelidmaatskap voortgesit behoort te word.

2.8 KWALIFIKASIE VIR INSTITUUTSLIDMAATSKAP

'n Organisasie kan, na betaling van 'n fooi, soos neergelê in die Reglemente, 'n Instituutslid word.

2.9 Verkiesing tot lid sal geskied volgens die Reglemente.

2.10 AANSPREKLIKHEID

Die aanspreeklikheid van lede vir die skulde en ondernemings van die Genootskap is beperk tot die bedrag van alle onopbetaalde ledegelde.

3. DIE RAAD

3.1 BESTUUR

Onderworpe aan die Grondwet en in ooreenstemming met die Reglemente, berus die bestuur van die Genootskap se sake by die Raad.

3.1.1 Die Raad vergader van tyd tot tyd om die sake van die Genootskap te bestuur.

3.1.2 By Raadsvergaderings is die kworum agt lede.

3.2 SAMESTELLING VAN DIE RAAD

Die Raad bestaan uit 15 lede, naamlik:

3.2.1 Ampsdraers

3.2.1.1 'n President

3.2.1.2 Twee Vise-Presidente

3.2.1.3 Die Pas-uitgetrede President

3.2.1.4 'n Eresekretaris

3.2.1.5 'n Tesourier

3.2.2 Nege gewone lede. Onder hierdie lede moet daar een verteenwoordiger van elk van die volgende streke wees: Noordelike Transvaal, Suidelike Transvaal, Oranje-Vrystaat, Natal, Oostelike Kaapprovinsie en Suid-Westelike Kaapprovinsie. (Die streke word deur die Raad afgebaken; die afbakening word op 'n Algemene Jaarvergadering goedgekeur en in die Regelemente beskryf.) 'n Streekstak moet een verteenwoordiger vir sy streek kies.

3.2.3 Ten minste vier van die volgende afdelings van Plantkunde moet deur ten minste een lid op die Raad, die Voorsitter en Ere-sekretaris uitgesluit, verteenwoordig word: Ekologie, Fisiologie, Morfologie, Sitogenetika, Taksonomie.

3.3 VERKIESBAARHEID VAN RAADSLEDE

Lede van die Raad moet Volle Lede van die Genootskap wees, wat hul verpligtinge nagekom het.

3.4 VERKIESING VAN RAADSLEDE

Verkiesing van Raadslede moet in ooreenstemming met die Reglemente geskied.

3.5 VAKATURES ONDER RAADSLEDE

3.5.1 Enige vakature wat in die geledere van die Raadslede wat nie deur middel van 'n bloknominasie verkies is nie, ontstaan, word deur die persoon gevul wat by die vorige verkiesing die grootste getal stemme onder die onsuksesvolle kandidate, op hom verenig het.

Indien daar geen sodanige onsuksesvolle kandidaat is nie, word die vakature by wyse van 'n tussenverkiesing gevul, met dié voorbehoud, dat die Raad volmag het om die vakature te vul indien dit na 30 September van die betrokke Raadslid se tweede diensjaar sou ontstaan.

3.5.2 Indien 'n ampsdraer van die Raad, wat as lid van 'n bloknominasie (kyk Regelement 3.2.2) sitting op die Raad verkry het, uit sy amp bedank, verbeur hy outomaties sy reg om Raadslid te wees. Die Raad het die reg om die vakature te vul. Die persoon deur die Raad aangewys se woonplek

moet so wees dat hy, saam met die orige lede van die bloknominasie, 'n funksionele uitvoerende eenheid kan vorm.

3.5.3 Enige Raadslid wat deur die Raad of 'n tussenverkiesing aangewys is om 'n vakature te vul, se ampstermyn op die Raad sal verval wanneer die Raadslid wie se plek hy ingeneem het, se dienstermyn normaalweg sou verval het.

3.6 PLAASVERVANGERS VAN RAADSLEDE

Indien 'n Raadslid nie 'n Raadsvergadering kan bywoon nie moet hy 'n plaasvervanger aanwys wat nie reeds lid van die Raad is nie en wat 'n volle lid van die Genootskap is wat sy verpligtinge nagekom het. Indien 'n Raadslid en sy plaasvervanger 'n Raadsvergadering gelyktydig bywoon, het die plaasvervanger geen stemreg nie. Indien 'n Raadslid twee keer gedurende sy ampstermyn nie skriftelik 'n plaasvervanger aanwys indien hy self nie 'n vergadering kan bywoon nie, kan hy deur die Raad as Raadslid geskors word en sal klousule 3.5 in werking tree.

3.7 AMPSTERMYN VAN RAADSLEDE

Raadslede beklee hul amp vir twee agtereenvolgende jare vanaf die einde van die A J V waarop hulle verkiesing tot Raadslid geldig word tot aan die einde van die A J V twee jaar later. Sewe lede moet jaarliks om die beurt uittree maar hulle is herkiesbaar. Die Pasuitgetrede President is outomaties vir nog twee jaar lid van die Raad.

3.8 VERKIESING VAN VISE-PRESIDENTE

Die Raad kies jaarliks uit eie geledere twee Vise-Presidente (kyk 3.2.1.2).

3.9 DIENSTERMYN VAN AMPSDRAERS

Ampsdraers, met die uitsondering van die twee Vise-Presidente, dien in hul onderskeie ampte vir twee jaar en is herkiesbaar in dieselfde of in enige ander amp, met dien verstande dat niemand in die amp van President vir twee agtereenvolgende dienstermyne mag dien nie, behalwe onder heel uitsonderlike omstandighede.

3.10 VERKIESBAARHEID VAN AMPSDRAERS

Geen lid is vir die amp van President verkiesbaar alvorens hy vir ten minste twee jaar in die Raad gedien het nie.

3.11 VERKIESING VAN RAADSLEDE

Raadslede moet deur Volle Lede van die Genootskap, wat hul verpligtinge nagekom het, genomineer word en elkeen van hulle is daarop geregtig om hoogstens vier kandidate te nomineer. Die Raad moet sorg dra dat nominasievorms nie later as 31 Oktober aan alle Volle Lede gestuur word. Alle nominasies, behoorlik deur 'n voorsteller onderteken, tesame met bevestiging dat die genomineerdes nominasie aanvaar, moet nie later as 14 November nie, by die Sekretaris van die Genootskap ingelewer word. Die name van die Streeksverteenvoordigers wat deur die Streeksafdelings verkies is, moet ook voor 14 November aan die Sekretaris van die Genootskap voorsien word.

3.12 UITVOERENDE KOMITEE

Die Uitvoerende Komitee van die Raad bestaan uit die ampsdraers.

3.12.1 Drie lede van die Uitvoerende Komitee vorm 'n kworum.

3.12.2 Die Uitvoerende Komitee tree in dringende gevalle namens die Raad op.

3.12.3 Alle stappe wat deur die Uitvoerende Komitee gedoen is, moet aan die volgende Raadsvergadering vir goedkeuring voorgelê word.

3.13 SEKRETARIAAT

Die Raad het die bevoegdheid om 'n Sekretaris en ander amptenare en dienare aan te stel en hulle te besoldig. Sodanige Sekretaris, amptenare en dienare is ampspligtig solank dit die Raad mag behaag, en hulle moet sodanige pligte uitvoer as wat die Raad aan hulle opdra.

3.14 NOTULES

Die Raad moet stappe neem dat notule gehou word van die verloop van alle Raadsvergaderings, dié van die Genootskap, Streekstakke en die verskillende komitees.

3.15 TOETREE- EN LEDEGELDE

Die Raad het die bevoegdheid om, onderhewig aan die goedkeuring van 'n Algemene Vergadering, toetreegelde en jaarlikse ledegelde te hef, vas te stel en te wysig.

3.16 BATES EN REKENINGE

Alle bates, eiendom en fondse van die Genootskap moet in die naam van die Genootskap gehou en geregistreer word. Die Raad het die mag om alle of enige roerende of vaste eiendom te koop, te verkoop, te verbeter, te bestuur, te verhuur, te verpand of op enige ander wyse te vervreem; om geld in te samel, te leen of te laat betaal, en om skenkings ter bevordering van die doelstellings van die Genootskap aan te neem. Daar moet noukeurig boek gehou word van alle bedrae wat deur die Genootskap ontvang en bestee word sowel as van die bates en laste van die Genootskap. Die Raad het die bevoegdheid om sodanige bankrekening te open as wat hy vir die doeleindes van die Genootskap nodig ag.

Die Eresekretaris of tesourier wat deur die Raad in diens geneem is, is verantwoordelik vir die bestuur van die Genootskap se fondse ooreenkomstig die opdragte van die Raad aan wie hy verantwoording moet doen. Die fondse van die Genootskap mag slegs vir die bevordering van die doelstellings van die Genootskap aangewend word.

3.17 OUDITEURING VAN BOEKE

Die boeke van die Genootskap moet minstens een keer per jaar geouditeer word deur 'n ouditeur wat by elke Algemene Jaarvergadering vir die volgende jaar aangestel word. Geen lid of amptenaar van die Genootskap mag vir die betrekking van ouditeur in aanmerking kom nie. Indien daar 'n toevallige vakature in die betrekking van ouditeur ontstaan, moet die Raad die vakature vul.

3.18 HANDTEKENINGE

Alle dokumente en stukke waarvoor daar namens die Genootskap geteken moet word, moet deur persone wat behoorlik daartoe deur 'n Raadsbesluit gemagtig is, geteken word.

3.19 JAARVERSLAG EN REKENINGE

Die Raad moet by elke Algemene Jaarvergadering 'n Jaarverslag oor die sake van die Genootskap voorlê tesame met 'n geouditeerde opgaaf van Inkomste en Uitgawe en 'n Balansstaat wat die stand soos op 30 November aandui.

3.20 VRYWARING

Elke Raadslid is slegs vir sy eie handeling aanspreeklik en nie vir enige handeling gedoen of gemagtig waaraan hy nie uitdruklik sy goedkeuring geheg het nie. Voorts het geen Raadslid persoonlike aanspreeklikheid van welke aard ook al ten opsigte van enige verlies of skade wat veroorsaak word deur enige handeling, aangeleentheid of gebeurte wat te goeder trou deur hom onderneem, gemagtig en toegelaat is vir die voordeel van die Genootskap nie, al sou dit die perke van sy wettige magte oorskry.

3.21 INLYWING VAN VERWANTE INRIGTINGS

Die Raad kan by ontvangs van 'n versoek van enige organisasie van wie die doelwitte ooreenstem met dié van die Genootskap, reël vir die affilïering of inlywing van 'n sodanige organisasie by die Genootskap, onder sodanige voorwaardes as waarop ooreengekom word, met die voorbehoud dat enige sodanige inlywing onderworpe is aan die goedkeuring van 'n Buitengewone Algemene Vergadering van die Genootskap, wat vir hierdie doel belê word.

3.22 STREEKSTAKKE

Die Raad kan na goeddunke en by ontvangs van 'n skriftelike versoek onderteken deur minstens vyf volle lede, woonagtig in 'n bepaalde distrik in Suidelike Afrika, 'n streekstak van die Genootskap in dié distrik in die lewë roep. Die sake van so 'n streekstak moet bestuur word ooreenkomstig die Grondwet en Reglemente en is onderworpe aan die beheer van die Raad.

3.22.1 STUDENTETAKKE

Studente wat in die gebied woon waar 'n streekstak gestig is, kan by die betrokke streekstak aansoek doen om magtiging vir die stigting van 'n studentetak van die streekstak. 'n Sodanige aansoek moet skriftelik ingedien word en moet ondersteun wees deur 'n meerderheid van die aangesigtes by 'n vergadering van minstens twintig studente onder voorsitterskap van 'n Volle Lid van die Genootskap. Die besluite van 'n streekstak ten opsigte van die vorming en bestuur van studentetakke is onderworpe aan bekragtiging deur die Raad.

3.22.2 ONTBINDING VAN 'N STREEKSTAK

Enige Streekstak of studentetak kan ontbind word deur 'n besluit van die Raad in hierdie verband, mits daar ses maande kennisgewing van sy voorneme deur die Raad aan elk van die Streekstakke gegee word. Indien 'n streekstak ontbind word, moet sy sake afgesluit en sy fondse bestee

word op 'n wyse wat deur die Raad bepaal word. Fondse en bates sal aangewend word soos in Klousule 4.8.2 uiteengesit word.

3.23 REGLEMENTE

Die Raad moet Reglemente opstel wat in ooreenstemming is met die bepalings van die Grondwet, vir die afhandeling van saketransaksies en die bestuur van die sake van die Genootskap; die Raad kan hierdie Reglemente te eniger tyd aanvul, intrek of wysig. Enige toevoeging tot, herroeping, of wysiging van die Reglemente sal aan die goedkeuring deur stemming van Volle Lede op 'n A J V onderworpe wees.

3.24 VERTOLKING

In 'n geval waar daar twyfel ontstaan omtrent die betekenis en strekking van enige gedeelte van die Grondwet en Reglemente is die vertolking van die Raad bindend op lede. Indien daar verskil van mening omtrent vertolking mag ontstaan, moet die Engelse weergawe as die standaardweergawe beskou word.

4. VERGADERINGS VAN DIE GENOOTSKAP

4.1 ALGEMENE JAARVERGADERINGS

Algemene Jaarvergaderings van die Genootskap word gedurende die laaste helfte van Januarie of gedurende Februarie gehou op 'n datum wat elke jaar deur die Raad bepaal word. Op hierdie vergadering word die jaarverslag van die Raad, die geouditeerde state van inkomste en uitgawe en die balansstaat voorgelê en oorweeg; word daar 'n aankondiging in verband met die samestelling van die Raad vir die volgende jaar gedoen; en word enige ander sake waarop die Raad mag besluit, ter tafel geneem. Beskrywingspunte vir die Algemene Jaarvergadering mag deur enige Volle Lid in ooreenstemming met die Reglemente ingedien word.

4.2 BUITENGEWONE ALGEMENE VERGADERING

Alle vergaderings van die Genootskap behalwe dié onder 4.1 uiteengesit, heet Buitengewone Algemene Vergaderings.

4.2.1 Die Raad kan 'n Buitengewone Algemene Vergadering belê (kyk 4.3).

4.2.2 Die Raad moet 'n Buitengewone Algemene Vergadering belê binne dertig dae vanaf die ontvangs van 'n skriftelike aansoek van minstens twintig Volle Lede wat hul verpligtings nagekom het, mits so 'n aansoek die doel waarvoor die vergadering verlang word, duidelik meld.

4.3 KENNISGEWING VAN ALGEMENE JAARVERGADERINGS EN BUITENGEWONE ALGEMENE VERGADERINGS

Kennisgewings van die Algemene Jaarvergadering en Buitengewone Algemene Vergaderings moet minstens veertien dae voor die datum wat vir sodanige vergaderings vasgestel is, aan lede by hulle geregistreerde adresse gestuur word.

4.4 VERSUIM VAN KENNISGEWING VAN VERGADERING

Die onropsetlike versuim om enige Volle Lid van 'n vergadering van die Genootskap in kennis te stel, maak geen besluit wat by so 'n vergadering geneem is, ongeldig nie.

4.5 STEMREG

Slegs Volle Lede wat hul verpligtinge nagekom het, het stemreg.

4.6 BY VOLMAG STEM

'n Volle Lid wat nie 'n Buitengewone Algemene Vergadering kan bywoon nie, mag by volmag stem; die persoon wat as gevolmagtigde aangewys is, moet 'n Volle Lid van die Genootskap wees wat sy verpligtinge nagekom het, en sy aanstelling as sodanig moet skriftelik by die Ere-sekretaris ingedien word.

4.7 WYSIGING VAN DIE GRONDWET

Indien die Raad dit wenslik ag om 'n wysiging van die Grondwet voor te stel by wyse van byvoeging, wysiging of intrekking, of indien minstens twintig Volle Lede skriftelik die wens om 'n wysiging uitspreek, moet die wysiging:—

(a) by 'n Buitengewone Algemene Vergadering, wat vir daardie doel belê is, en wat met die Algemene Jaarvergadering mag saamval, oorweeg word. Vir die aanvaarding van enige wysiging van die Grondwet moet minstens twee derdes van die stemme wat uitgebring word, ten gunste daarvan wees,

of

(b) indien die Raad dit wenslik ag, aan alle Volle Lede wat hul verpligtinge nagekom het, voorgelê word vir 'n beslissing deur middel van posstemming. Voordat die voorgestelde wysiging aanvaar kan word, moet minstens vyf-en-twintig persent van die stemgeregtigde lede hul stem uitbring en minstens twee derdes van die stemme wat uitgebring word, ten gunste van die wysiging wees.

4.8 ONTBINDING

Dit Genootskap kan gelikwieder en sy sake afgesluit word, of dit kan met 'n soortgelyke liggaam amalgameer, deur 'n besluit wat aan 'n Jaarvergadering of Buitengewone Algemene Vergadering voorgelê en aanvaar word. Minstens vyf-en-sewentig persent van die stemme wat uitgebring word, moet ten gunste van so 'n ontbinding of amalgameer wees en sodanige besluit is onderworpe aan bekragtiging deur 'n posstemming waarin minstens vyf-en-twintig persent van die stemgeregtigde lede gestem het en minstens twee derdes van die stemme wat uitgebring is, ten gunste van ontbinding of amalgameer is.

4.8.1 By die voorlegging van so 'n besluit aan die lede moet daar besluit word oor die wyse waarop surplus bates van die Genootskap, na die vereffening van alle skulde, aangewend moet word. Dit moet deur posstemming geskied op dieselfde grondslag as in 4.8 aangedui.

4.8.2 Na die ontbinding van óf die Genootskap óf enige van sy Streeks-takke, sal die oorblywende fondse en bates volgens ondergenoemde voorwaardes beheer word. (L.W. Die doel van genoemde voorwaardes is om die Genootskap of sy Streekstakke in staat te stel om geskenke of bemakings wat van belasting of boedelbelasting vrygestel is, te ontvang).

(a) Oorblywende bates mag alleenlik tot voordeel van die publiek van die Republiek van Suid-Afrika en/of van die gebied van Suidwes-Afrika bestee word.

(b) Oorblywende bates mag alleenlik oorgedra word na óf

(i) 'n opvoedkundige-, godsdienstige- of liefdadigheidsinrigting; óf

(ii) inrigtings van 'n openbare aard binne die gebiede aangestip in (i) wat self van belasting vrygestel is.

5. MEDALJES EN TOEKENNINGS

Daar word drie Medaljes vir Plantkunde en een Sertifikaat van Verdienstelikheid deur die Genootskap toegeken naamlik:

5.1 DIE SUID-AFRIKAANSE MEDALJE VIR PLANTKUNDE

5.1.1 Kwalifikasies vir toekenning van die medalje

5.1.1.1 Die medalje is die hoogste toekenning vir Plantkunde in Suid-Afrika en word uitsluitlik toegeken op grond van uitstaande plantkundige navorsing.

5.1.1.2 Die toekenning word slegs in uitsonderlike gevalle en slegs aan uitstaande kandidate wie se werk deur die Raad as van besondere hoë standaard beskou word, gemaak.

5.1.1.3 Die Medalje mag aan enige plantkundige wat 'n besondere merietwaardige bydrae tot plantkundige navorsing gemaak het, toegeken word.

5.1.1.4 Die medalje mag slegs aan een persoon per kalenderjaar toegeken word.

5.1.2 Nominasies vir die medalje

5.1.2.1 Nominasies vir die medalje kan deur 'n Volle Lid van die Genootskap aan die Raad voorgelê word.

5.1.2.2 'n *Curriculum vitae* van die voorgestelde kandidaat moet ingedien word tesame met 'n volledige lys van sy publikasies, asook 'n waardering van die kandidaat se wetenskaplike bydrae tot plantkunde.

5.1.2.3 Die Raad sal sorg dat 'n aanvraag vir nominasies voor 30 April van elke jaar aan alle Volle Lede gestuur word. Nominasies moet die Sekretaris nie later as 10 Julie bereik nie.

5.1.2.4 Indien 'n persoon in meer as een jaar voorgestel word moet 'n volledige *curriculum vitae*, lys van publikasies en waardering van sy bydrae tot plantkunde opnuut voorgelê word.

5.1.3 Verkieasing

5.1.3.1 Geen bespreking van genomineerdes sal in 'n Raadsvergadering plaasvind nie.

5.1.3.2 Stembriefies sal deur ten minste drie lede van die Uitvoerende Komitee van die Raad getel word. Raadslede sal skriftelik van die uitslag verwittig word. Die Sekretaris sal aan die kandidaat meedeel dat 'n medalje aan hom/haar toegeken is en by welke geleentheid dit oorhandig sal word.

5.1.3.3 Om verkies te word moet minstens 12 Raadslede 'n gunstige stem uitbring.

5.1.4 Oorhandiging van medalje

Die oorhandiging sal op 'n tyd of geleentheid geskied soos deur die Raad bepaal.

5.2 DIE S A G P SENIOR MEDALJE VIR PLANTKUNDE

5.2.1 Kwalifikasies vir toekenning van die medalje

5.2.1.1 Die medalje word toegeken op grond van uitstaande navorsing en/of ander bydraes tot die bevordering van plantkunde in Suid-Afrika.

5.2.1.2 Die medalje mag aan enige plantkundige toegeken word.

5.2.1.3 Die medalje mag slegs aan een persoon in enige gegewe kalender jaar toegeken word.

5.2.1.4 Geen toekenning sal gemaak word indien die meriete van die kandidaat na die Raad se mening nie aan die vereiste hoë standaard voldoen nie.

5.2.2 Nominasies vir die medalje

Nominasies word op dieselfde wyse gedoen soos neergelê vir die "Suid-Afrikaanse Medalje vir Plantkunde" (5.1.2). In gevalle waar 'n kandidaat se bydrae nie alleen tot wetenskaplike navorsing beperk is nie, moet daar op die ander aspekte uitgebrei word.

Verkieasing

Om verkies te word moet minstens 10 Raadslede 'n gunstige stem uitbring.

5.2.4 Oorhandiging van medalje

Soos vir die "Suid-Afrikaanse Medalje vir Plantkunde" (5.1.4).

5.3 DIE S A G P JUNIOR MEDALJE VIR PLANTKUNDE

5.3.1 Kwalifikasies vir toekenning van medalje

5.3.1.1 Die medalje word toegeken vir die beste proefskrif oor 'n plantkundige onderwerp wat gedurende die vorige kalenderjaar tot die toekenning van 'n doktorsgraad aan 'n Suider-Afrikaanse Universiteit gelei het. (Sluit alle gebiede Suid van Angola, Zambië, Malawi en Mosambiek in. Slegs Afrikaanse en Engelse proefskrifte aanvaarbaar).

5.3.1.2 Die medalje kan net aan een persoon in enige gegewe kalenderjaar toegeken word.

5.3.1.2 Geen toekenning sal gemaak word indien die meriete van die kandidaat na die Raad se mening nie aan die vereiste hoë standaard voldoen nie.

5.3.2 Nominasies vir die S A G P Junior Medalje vir Plantkunde

5.3.2.1 Nominasies vir die medalje word jaarliks aangevra.

5.3.2.2 Voor die einde van Maart van elke jaar sal die Ere-Sekretaris 'n uitnodiging aan alle Universiteite in Suider-Afrika rig om elk nie meer as een proefskrif vir be-oordeling voor te lê nie. Proefskrifte moet die Sekretaris voor die einde van April van die jaar waarin be-oordeling plaasvind bereik.

5.3.3 Be-oordeling van voorgelegde proefskrifte

5.3.3.1 'n Paneel van drie be-oordelaars sal deur die Raad aangewys word sodra die proefskrifte beskikbaar is.

5.3.3.2 Die meerderheidsbesluit van die be-oordelaars sal finaal wees en daar sal geen bespreking of korrespondensie oor die resultate gevoer word nie.

5.3.3.3 Die besluit van die beoordelaars moet nie later as 31 Julie aan die Sekretaris beskikbaar gestel word nie.

5.3.4 Oorhandiging

Soos vir die "Suid-Afrikaanse Medalje vir Plantkunde (5.1.4).

5.4 DIE S A G P SERTIFIKAAT VAN VERDIENSTELIKHEID

5.4.1 Kwalifikasies vir toekenning van die sertifikaat

5.4.1.1 Die sertifikaat word toegeken vir uitstaande bydraes op weten-

skaplike, tegniese, artistiese, opvoedkundige of enige ander plantkundige gebied deur enige persoon wat nie in besit van 'n Universiteitsgraad in Plantkunde is nie.

5.4.1.2 Die sertifikaat kan aan enige persoon, niestaaende sy/haar beroep, wat volgens 5.4.1.1 kwalifiseer toegeken word.

5.4.1.3 'n Formele tegniese of ander plantkundige opleiding wat nie gelei het tot 'n Universiteitsgraad in Plantkunde nie sal nie 'n kandidaat diskwalifiseer nie.

5.4.1.4 Die Sertifikaat kan net aan een persoon in enige gegewe kalenderjaar toegeken word.

5.4.1.5 Geen toekenning van die sertifikaat sal gemaak word indien die meriete van die kandidaat na die Raad se mening nie aan die vereiste hoë standaard voldoen nie.

5.4.2 Nominasies vir die sertifikaat

Nominasies word op dieselfde wyse gedoen soos neergelê vir die "Suid-Afrikaanse Medalje vir Plantkunde" (5.1.2).

5.4.3 Verkiesing

Om verkies te word moet minstens 10 Raadslede 'n gunstige stem uitbring.

5.4.4 Oorhandiging van die sertifikaat

Soos vir die "Suid-Afrikaanse Medalje vir Plantkunde" (5.1.4).

REGLEMENTE

1. VERKIESING TOT LIDMAATSKAP

1.1 VERKIESING OF OORPLASING DEUR RAAD

Die verkiesing of oorplasing van kandidate na enige graad van lidmaatskap van die Genootskap word deur die Raad gereguleer en beheer.

1.2 VERKIESING VAN GEWONE LEDE, EN GEAFFILIEERDE LEDE

'n Kandidaat vir verkiesing tot die graad van Gewone Lid of Geaffilieerde Lid moet die voorgeskrewe aansoekvorm voltooi waarop die name van 'n voorsteller en twee sekondante, wat almal Volle Lede moet wees, moet verskyn.

1.3 VERKIESING VAN STUDENTELEDE

'n Kandidaat vir verkiesing tot die graad van Studentelid moet die voorgeskrewe aansoekvorm voltooi en moet deur 'n Volle Lid voorgestel word wat op grond van persoonlike kennis oor die geskiktheid van die kandidaat moet getuig.

1.4 OORPLASING NA NUWE GRAAD VAN LIDMAATSKAP

Reglement 1.2 is van toepassing op die oorplasing van 'n lid van een graad na 'n ander.

1.5 VERKIESING VAN ERELEDE

1.5.1 Alle sake rakende die voorstelling van Erelede sal ten alle tye vertroulik wees ter beskerming van die voorgestelde kandidaat.

1.5.2 Erelidmaatskap sal deur 'n lid voorgestel en deur tien of meer lede gesekondeer word. Alle voorstellers en sekondante moet stemgeregtigde lede van goeie naam wees. Die voorstel sal van 'n volledige *curriculum vitae* en motivering vergesel word.

1.5.3 Die voorstel sal deur 'n komitee van drie deskundiges op die gebied van die kandidaat oorweeg word. Hierdie komitee sal deur die Raad benoem word.

1.5.4 Die komitee sal die volgende punte in ag neem vir oorweging van kandidate:

- (a) Aansien in bepaalde rigting van betrokke plantkundige werk;
- (b) Dienste gelewer ten bate van Plantkunde in Suider-Afrika.
- (c) Eer bewys aan die kandidaat terwyl nog in die lewe maar nie noodwendig nog aktief besig met plantkundige werk nie.
- (d) Professionele kwalifikasies hoef nie deurslaggewend te wees nie.

1.5.5 Die komitee sal 'n vertroulike verslag sowel as hulle aanbeveling aan die Raad voorlê. Die Raad sal 'n finale beslissing gee en die sekretaris opdrag gee om of:

- (i) 'n skrywe te rig aan die kandidaat om te verneem of die aangebode Erelidmaatskap aanvaarbaar is; óf
- (ii) die voorsteller skriftelik in kennis stel dat die saak afgehandel is sonder dat uitvoering aan die versoek gegee is, maar dat die saak steeds as vertroulik beskou moet word.

2. LEDEGELDE

2.1 LEDEGELDE

Die jaarlikse ledegelde is soos volg:—

GRAAD	LEDEGELD
Erelid	Geen
Lewenslange Lid	R50-00 (eenmalig)
Gewone Lid	R5,00
Geaffilieerde Lid	R4,00
Studentelid	R2,00
Instituutslid	R25,00

22. JAARLIKSE LEDEGELDE BETAALBAAR

Jaarlikse ledegelde is op 1 Julie van elke jaar betaalbaar.

2.3 NALATIGES

'n Lid wie se jaarlikse ledegeld op 31 Julie van enige jaar agterstallig is, word as nalatig beskou en is nie langer geregtig op die ontvangs van die kennisgewing en publikasies van die Genootskap of enige regte en voorregte van lidmaatskap nie.

2.3.1 'n Lid wie se jaarlikse ledegeld vir een jaar lank onbetaal is, kan deur 'n Raadsbesluit uit die Genootskap uitgesluit word en sy lidmaatskap word daarna beëindig. Kennisgewing van hierdie uitsluiting moet skriftelik aan hom gestuur word by sy jongste geregistreerde adres drie maande voor die vervaldatum van sy lidmaatskap. Sodanige uitsluiting onthef hom egter nie van die aanspreeklikheid vir bedrae nog deur hom verskuldig nie. Die lidmaatskap van enige persoon wie se lidmaatskap op hierdie wyse beëindig is, kan indien dit die Raad behaag en by betaling van alle verskuldigde gelde, herstel word binne een jaar vanaf die datum waarop die beslissing waarvolgens hy uitgesluit is, geneem is. Hierna mag hy slegs onder sodanige voorwaardes as waarop die Raad mag besluit, hertoegelaat word.

2.4 LEDEGELD BY BEREIKING VAN AFTREE-OUDERDOM

'n Lid wat sy verpligtings nagekom het, en wat die ouderdom van vyf-en-sestig jaar bereik het, en minstens vyftien jaar lank ononderbroke lid van die Genoot-

skap was, kan met die behoud van die voorregte verbonde aan sy lidmaatskapgraad, by die Raad aansoek doen om sy ledegeld aan te pas.

2.4.1 'n Lid wat onder hierdie klousule ressorteer, en wat minstens vyf-en-twintig jaar lank ononderbroke lid van die Genootskap was, word, op aansoek, vrygestel van die verdere betaling van ledegelde.

2.5 KWYTSKELDING VAN LEDEGELDE

Die Raad kan in buitengewone omstandighede die ledegeld van enige lid verminder of hom dit kwytsekeld.

2.6 INSTITUUTAFGEVAARDIGDES

Instituutlede van die Genootskap kan twee afgevaardigdes na kongresse, werkgroepe of ander geleenthede teen die normale tariewe wat op gewone lede van toepassing is, stuur.

3. VERKIESING VAN RAADSLEDE

3.1 VERKOSE RAADSLEDE

Verkose Raadslede word deur Volle Lede van die Genootskap, wat hul verpligtings nagekom het, genomineer en elkeen van hulle is daarop geregtig om hoogstens vier kandidate te nomineer. Die Raad moet sorg dra dat nominasievorms nie later as 31 Oktober nie aan alle Volle Lede gestuur word. Alle nominasies behoorlik deur 'n voorsteller onderteken, tesame met bevestiging dat die genomineerdes nominering aanvaar moet nie later as 14 November nie by die sekretaris van die Genootskap ingelewer word.

3.1.1 Indien die getal nominasies die vakaturetaal oorskry, word 'n post-stemlys wat die volle name van die kandidate en hul sake-adresse en beroepe aandui, voor of op 21 November aan alle Volle Lede gepos. Stem-briefies moet, na behoorlike voltooiing, aan die Ere-sekretaris terugbesorg word om hom nie later as 12h00 op 7 Desember te bereik nie.

3.1.2 Indien die nominasielys nie genoeg lede bevat om al die vakatures te vul nie moet die Uitvoerende Komitee geskikte lede nomineer om die lys te voltooi.

3.1.3 Op 'n Raadsvergadering voor 7 Desember word uit die geleedere van die Raad drie stemopnemers gekies op wie die taak sal rus om die stem-briewe oop te maak, te ondersoek en die uitslag, wat as finaal beskou word, aan die Uitvoerende Komitee te rapporteer.

3.1.4 Indien 'n gelyke getal stemme op twee of meer kandidate uitgebring word, wat nie almal gekies kan word nie, moet die Uitvoerende Komitee met geslote briefies stem om te besluit watter kandidaat/kandidate gekies moet word. Waar 'n gelyke getal stemme op twee of meer kandidate uitgebring word, het die President 'n gewone en 'n beslissende stem.

3.2 DIE UITVOERENDE KOMITEE VAN DIE RAAD

3.2.1 Die Uitvoerende Komitee bestaan uit ses ampsdraers omskrywe in klousule 3.2.1 van die Grondwet, te wete die President, twee Vise-Presidente, die Pasuitgetrede President, die Sekretaris en die Tesourier.

3.2.2 'n Bloknominasie mag gemaak word vir 'n President, Sekretaris en Tesourier. Hierdie drie persone se woonplekke moet so wees dat hulle 'n funksionele uitvoerende eenheid sal vorm wat die hoofkantoor sal wees.

3.2.3 'n Bloknominasie kan deur die Raad of streekstakke gemaak word. Die skriftelike toestemming van genomineerdes moet alle nominasies vergesel.

3.2.4 Die dienstermyn van die drie gekose lede, sal twee jaar wees.

3.2.5 Die reiskoste van slegs *een* lid van die Uitvoerende Komitee of van die Raad mag normaalweg deur die Genootskap betaal word.

4. DIE RAADSVERGADERINGS EN -PLIGTE

4.1 VOORSITTER

Die President, of in sy afwesigheid 'n Vise-President, of in afwesigheid van al drie, 'n Raadslid wat deur die vergadering gekies is, tree as Voorsitter by 'n Raadsvergadering op.

4.2 STEMPROSEDURE

By Raadsvergaderings moet alle aangeleenthede deur die meerderheidstem beslis word, met dië voorbehoud dat wanneer sake bespreek word waarvan daar nie by 'n vorige vergadering of op die Agenda behoorlik kennis gegee is nie, die stemming op versoek van 'n aanwesige lid, gesteun deur 'n sekondant, oorstaan tot die volgende vergadering wanneer kennisgewing van die aangeleentheid aldus uitgestel, op die Agenda moet verskyn.

4.2.1 Die Voorsitter het 'n gewone stem en in gevalle waar gelykop gestem is, ook 'n beslissende stem.

4.3 AANSTELLING VAN KOMITEES EN VERTEENWOORDIGERS

Die Raad stel komitees en verteenwoordigers met hul plaasvervangers aan soos benodig word.

4.3.1 Die President is *ex officio* lid van alle Komitees.

5. ALGEMENE VERGADERINGS

5.1 VOORSITTER

Die President, of in sy afwesigheid 'n Vise-President, of in die afwesigheid van al drie, 'n Lid wat deur die vergadering gekies is, tree as Voorsitter by 'n vergadering van die Genootskap op.

5.2 KWORUMS

Die kworum vir Algemene Jaarvergaderings is die getal lede aanwesig.

5.2.1 Die kworum vir Buitengewone Algemene Vergaderings is vyf-en-twintig Volle Lede wat hul verpligtinge nagekom het.

5.2.1.1 Indien daar nie 'n kworum by 'n Buitengewone Algemene Vergadering is nie, moet die vergadering uitgestel word vir 'n tydperk van minstens veertien dae en hoogstens dertig dae vanaf die datum waarop die Buitengewone Algemene Vergadering gehou is en enige getal Volle Lede wat hul verpligtings nagekom het en wat dan by so 'n uitgestelde Buitengewone Algemene Vergadering teenwoordig is, vorm 'n kworum.

5.3 STEMMING

Alle voorstelle wat aan 'n Gewone Jaarvergadering of aan 'n Buitengewone Vergadering voorgelê word, word deur meerderheidstem beslis, met die voorbehoud dat stemming by wyse van geheime stembriefies deur enige twee Volle Lede wat hul verpligtings nagekom het, geëis kan word.

5.3.1 Die Voorsitter by 'n Gewone Jaarvergadering of 'n Buitengewone Algemene Vergadering het 'n beraadslagende sowel as 'n beslissende stem.

6. STREEKSTAKKE

6.1 REËLS

Streekstakke moet hul sake in ooreenstemming met die reëls wat deur die Raad goedgekeur is, behartig.

6.2 VERSOEK OM 'N STREEKSTAK TE STIG

Versoeke moet aan Artikel 3.22 van die Grondwet van die Genootskap voldoen. Dit hou in dat die versoek skriftelik aan die Raad gerig moet word, dat dit deur minstens vyf Volle Lede wat in die spesifieke streek in Suider-Afrika woonagtig is, onderteken moet wees, en dat die sake van 'n Streekstak in ooreenstemming met die Grondwet en Reglemente van die Genootskap behartig moet word waar dit van toepassing is, en dat die Streekstak aan die beheer van die Raad onderhewig moet wees.

6.3 STREEKSKOMITEES

Daar word aanbeveel dat Streekskomitees uit minstens die volgende bestaan:

6.3.1 'n Voorsitter

6.3.2 'n Vise-Voorsitter

6.3.3 'n Eresekretaris/-Tesourier

6.3.4 Vier Gewone Lede

6.4 NOTULE

Afskrifte van die notules van alle verrigtinge van Streekstakke moet aan die

Raad gestuur word in ooreenstemming met Artikel 3.14 van die Grondwet van die Genootskap.

6.5 JAARVERSLAE EN REKENINGE

Elke Streekstak dien 'n jaarverslag oor die sake van die betrokke Afdeling in asook sy state van inkomste en uitgawes en 'n balansstaat soos op die jongste 30 November om die Sekretaris minstens 14 dae voor die Algemene Jaarvergadering van die Genootskap te bereik.

6.6 FINANSIES

Die Raad styf die fondse van 'n behoorlik gekonstitueerde Streekstak teen 'n tarief van R1 vir elke geregistreerde lid van die Streekstak wat sy verpligtinge nagekom het.

6.7 STUDENTETAKKE

(Kyk Artikel 3.22.1 van die Grondwet van die Genootskap).

6.8 ONTBINDING VAN 'N STREEKSTAK

(Kyk Artikel 3.22.2 van die Grondwet van die Genootskap).

6.9 VERTEENWOORDIGING VAN 'N STREEKSTAK OP DIE RAAD

(Kyk Artikel 3.2.2 van die Grondwet van die Genootskap.)

7. AFBAKENING VAN STREKE

7. DAAR IS SES STREKE, NL:

7.1.1 DIE NOORDELIKE TRANSVAALSTREEK

wat bestaan uit dié gedeelte van Transvaal noord van die 26ste breedtegraad en sluit die gebiede Botswana en Rhodesië in, maar sluit Swaziland uit.

7.1.2 DIE SUIDELIKE TRANSVAALSTREEK

wat uit dié gedeelte van Transvaal suid van die 26ste breedtegraad bestaan en die gebied Swaziland insluit.

7.1.3 DIE ORANJE-VRYSTAATSTREEK

wat bestaan uit die Provinsie Oranje-Vrystaat, die gebiede Lesoto en Suidwes-Afrika (Namibië) en dié gedeelte van die Kaapprovinsie noord van 'n lyn getrek vanaf Modderivier (suid van Kimberley) tot by die snypunt van die Oranjerivier en die 20ste lengtegraad.

7.1.4 DIE NATALSTREEK

wat uit die Provinsie Natal bestaan.

7.1.5 DIE OOSTELIKE KAAPPROVINSIESTREEK

wat bestaan uit dié gedeelte van die Kaapprovinsie oos van die 22ste lengtegraad.

7.1.6 DIE SUIDWESTELIKE KAAPPROVINSIESTREEK

wat bestaan uit dié gedeelte van die Kaapprovinsie wes van die 22ste lengtegraad en suid van die grens van die O V S-streek soos in 7.1.3 afgebaken.